

德壯果公年譜

德壯果公年譜卷二

次孫花沙納恭纂

乾隆五十三年戊申

公四十四歲

二月初一日

福康安海蘭察鄂輝奏言賊首逃入內山經

臣

等分派官

兵堵截要隘令各番社生番在內山一體截拏茲據社丁

杜敷報稱林爽文帶領匪眾六七千人在埔里社至埔尾

沿溪山溝內逃走因東南一帶鑾鑾等社生番堵截嚴密

不敢竄往南路現已向北逃去等語

臣

親往各處隘口沿

山搜查並催調糧餉雇夫背運入山以爲追賊官兵之用
一面飛飭通事王松帶領獅子頭社番於要路迎頭堵截
一面商令海蘭察鄂輝帶同舒亮普爾普恆瑞普吉保袁
國璜穆克登阿許世亨及巴圖魯侍衛等由歸仔頭內木
柵各隘口分路進山連夜追趕臣往來各路督催官兵何
處緊要卽於何處帶兵策應於二十五日至麻薯社一帶
聞林爽文於二十四日夜間在東勢角地方被生番截殺
四百餘人餘衆沿山北去查看賊人蹤跡係兩路逃走隨
將官兵分爲兩路海蘭察舒亮恆瑞穆克登阿許世亨袁
國璜由東勢角前進鄂輝普爾普普吉保由樸仔離東山

前進山徑險窄穿林越箐不能乘馬均屬徒步登陟官兵等沿山搜捕殺死賊匪二千餘名拏獲活賊四十餘名奪獲大小礮位及槍杆刀矛七百餘件二十七日行至獅子頭社見山溝內賊屍縱橫徧地數里不絕而河內淹斃之賊亦多據王松及生番等稟稱林爽文於二十五日到獅子頭地方賊匪等因日夜行走腿腳俱已發腫過河淹斃一千餘名社內生番堵截去路又殺死賊匪二千餘名止贖賊一二百人過山逃去大約從貓里社逃往三貂地方生番等不認得林爽文不知可曾殺死等語隨將各生番所獻首級並拏獲活賊逐一認識俱非林爽文仍卽分路

帶兵馳往追捕

臣

查臺灣以東皆係大山越過大山數十

重東面仍屬瀕海三貂社在淡水極北轉東逼近海岸與

蛤仔欄社相近本係番界間有貧民前往租地耕墾今林

爽文在內山逃往三貂必由蛤仔欄經過前經

臣

檄調副

將徐鼎士同知徐夢麟帶領生熟番眾至蛤仔欄邀截徐

夢麟已於本月二十五日同都司徐機至八堵地方屯劄

查八堵至蛤仔欄不過二百餘里層巒疊嶂山徑陡峭步

行前進約有三四日程途且該處均係生番居住必須熟

悉情形之人方能前往前已訪明居住三貂之吳沙許天

送及生番通事張光彩等最爲熟悉復示以重賞令其徧

諭該處生番擒獻逆匪並卽帶領官兵入山堵截查逆首
竄逸內山隨行賊匪尙有數千官兵追趕及生番邀截業
已誅戮殆盡沿途餓斃者又有千餘名現在四路圍逼逆
首已無存身竄迹之地一經追及卽可成擒惟獅子頭社
所殺賊匪首級俱被生番割去其中不無有名頭目自應
逐加識認而生番性嗜殺人所得首級皆攜回巢內以誇
武勇不肯全行獻出驗過者不過數百顆茲已將出力生
番按名給賞諭令將首級呈驗認非賊目再行給還庶知
賊目何人被殺何人逃逸按名緝獲以期盡絕根株不留
遺孽又正月初一日至各仔社一帶內殺死奔逃賊匪二

百餘名拏獲假扮林爽文之賴達一名活賊四十餘名訊據賴達供稱林爽文自獅子頭社痛勦之後隨行賊夥又被沿途官兵生番殺散所賸無多林爽文原欲向北逃竄見山內官兵圍截嚴密又聞三貂等處亦有兵番截拏不敢前往在打鐵寮一帶山溝樹林內藏匿尙無一定去向等語官兵遂至打鐵寮追捕由蝦骨社合歡社直至炭窰地方又搜獲零星賊匪百餘名查炭窰與南港仔山口相通出山不遠卽係海岸惟恐林爽文被山內官兵追急潛行出山向海口逃逸復派各營官兵由後壠至中港又自竹塹至桃仔園沿山密布

臣福康安海蘭察鄂輝舒亮普

爾普恆瑞許世亨普吉保袁國璜穆克登阿特勒登徹六
十七春甯及巴圖魯侍衛將弁人等各分隘口四路圍截
該處草深樹密溝壑甚多大隊官兵恐難於隱僻地方逐
處查剿致有遺漏兼恐逆首見官兵追至驚懼自戕不能
生獲因揀派巴圖魯侍衛二十員貴州廣東屯練兵丁數
百名改裝易服扮作民人同淡水義民差役及社丁通事
等分投搜緝於初四日在老衢崎地方將逆首林爽文賊
目何有志一同擒獲現在搜查逃竄餘匪又拏獲林琴陳
傳吳萬宗賴其瓏等四名均係有名頭目一俟搜查淨盡
並令入山各兵休息數日卽行統率大兵肅清南路至南

路賊匪情形現猶屯聚大武隴赤山保大穆降水底寮等處聞官兵蕩平北路心懷畏懼黨羽漸離特恐義民截殺不敢相率投誠而被脅村民亦以賊未解散不敢遽行倡義經臣分遣熟悉南路賊情之舉人郭廷機廩生王維清等齎示撫諭村民離間賊黨並以大武隴等處與諸羅接壤行知柴大紀及參將李隆張萬魁知縣陳良翼將投出之人妥爲安輯茲據柴大紀等報有賊目何北海一名賊匪魏振元等十六名自行投出內有蕭盛賴育二名拏獲賊匪林靴林旺贖罪陳良翼報有賊匪吳雲林壓等四十八名均已自行投出又舉人郭廷機帶出南路投誠賊目

許參陳送期陳吾春顏院林快士黃充來營並據賊目郭
照高爲遣郭敬同來稟稱林爽文三弟林勇帶同賊夥在
大武壠潛匿情愿設法擒獻再行投出臣俱已免究前罪
令其孥賊自效看來南路賊匪黨羽漸已解散大兵一到
無難剋日殲除

諭曰福康安等自鹿仔港進兵後督率將弁奮勇攻剿連次克捷
前於嘉義縣破賊解圍業經降旨將福康安海蘭察晉封公爵
賞給紅寶石頂四團龍褂以示優獎今逆首林爽文經福康安
等設法生擒辦理周妥實屬可嘉特親解御用佩囊二箇分賜
福康安海蘭察用昭恩眷所有在事出力之將弁等著福康安

查明咨部議敘其隨征兵丁並著分別獎賞

又

諭曰此次福康安等統率官兵前往臺灣剿捕逆匪未及兩月卽將首逆林爽文生擒解京大功指日告竣固由福康安調度有方所向克捷而將弁兵丁等隨同剿捕亦俱爭先效命用能掃逆擒渠安速集事殊屬可嘉前已有旨令福康安查明咨部議敘本日據福康安奏請將出力之侍衛章京將弁等分別賞給巴圖魯名號加陞職銜翎頂均照所請行其餘將領等仍著福康安查明咨部一併議敘兵丁等優加賞賚以示朕獎勵戎行至意

公因得

賜繼勇巴圖魯名號

兵部發給一等功牌

正黃旗蒙古哈豐阿佐領下健銳營副前鋒參領西朗阿
巴圖魯德楞泰乾隆五十二年因勦斃臺灣逆匪攻破嘉
義縣奮勇列爲超等由部照例從優議敘給與頭等功牌

二軸作爲將來執照

按西朗阿巴圖魯卽繼勇二字

二十七日

福康安海蘭察鄂輝奏言十九日殺散南潭大穆降賊匪
擒拏活賊甚多逐加訊問俱稱莊大田向南奔竄鄂輝普

爾普拏獲賊匪所供亦屬相同隨將匪犯正法卽帶領官兵南下行至岡山之太林莊鄂輝亦自大武隴山內新豐里搜勦前來據普爾普報稱十九日夜間在大武隴隘口駐劄有賊匪潛來劫營普爾普已早有準備帶兵衝出殺賊一百餘名生擒七十餘名二十一日與鄂輝在東勢莊相遇仍帶兵往北面山內搜查等語臣等至下埤頭一帶探知各處餘匪紛紛奔逃南下俱在枋寮聚集並據派往水底寮安撫之副將張芝元知府楊廷理等稟稱官兵未到水底寮之前有逃來賊匪數千人復將該處占據隨商令海蘭察鄂輝恆瑞帶兵進勦臣福康安沿途搜查賊莊

隨後接應二十六日海蘭察等遇賊二千餘人沿山抄截官兵後路一面穆克登阿梁朝桂副將岱德參將張朝龍防備南來賊匪一面令許世亨六十七烏什哈達帶兵迎擊海蘭察等率領巴圖魯侍衛等由蔗園內出其不意橫衝賊陣射死賊目陳建平曾大達及不知姓名騎馬賊目十餘人奪獲賊馬三十餘匹殺死賊匪三百餘人乘勝追趕匪衆多人俱在海岸排列因無船不能偷渡復來拚死迎拒官兵奮勇直前殺賊一千餘名自行投海及擠入海中淹斃者不計其數所棄槍礮器械甚多俱經官兵奪獲所有臨陣生擒賊目藍九榮等十九名賊匪二百餘名業

經正法至海口一帶節經派兵防守並將大小船隻驅出外港嚴行封禁常青復添派弁兵自鹿耳門直至東港梭織巡查辦理極爲嚴密再此次官兵奮勇殺賊帶傷陣亡者甚少惟義民首鄭其仁引導先行遇賊陣亡殊堪憫惜

臣已將該義民首家屬給與銀兩以資收殮查鄭其仁係

恩賞守備職銜並令以實缺補用之員應請卽照守備之例議卹再查鳳山縣自賊匪復陷之後衙署義民房屋及荊竹圍城皆被焚燬大兵進剿南路時該處並無賊人屯聚現已分派官兵前往駐守再臣等在枋寮打仗殺賊時探知敗逃賊匪尙有數千人在極南之瑯嶠潛匿莊大田亦由山

內竄往該處路徑崎嶇樹木深密若不籌截去路大兵一到必致驚竄遠颺緝捕又稽時日查瑯嶠地方山內十八社皆係生番直通傀儡大山其山外之柴城隴巒等處逼近海岸亦有閩粵民人居住隨密諭該處民人務將逃來賊匪偽爲容留毋令聞風驚散一面傳出瑯嶠各社生番面加曉諭在沿山隘口處處嚴密堵截又有山豬毛義民首曾中立招集傀儡山生番一千名聽候調遣各處布置已定派令烏什哈達帶領福建水師及廣東兵丁乘舟由海道前往海蘭察鄂輝等帶領大兵由山路進發

臣福康

安督催各兵前進於二月初四日行抵風港據柴城民人

報稱莊大田帶同匪衆俱在柴城欲往竊率社經番衆極力抵禦復行退回現在居民等密相約會官兵到彼賊匪斷難逃逸等語初五日黎明由風港發兵越箐穿林道路極爲逼窄凡遇險要地方俱酌量留兵扼守以備接應約行二十餘里賊匪多人從樹林內突出前隊之侍衛博斌副將岱德參將張朝龍都司張占魁等帶兵迎擊海蘭察鄂輝率領巴圖魯侍衛奮勇齊攻殺賊三百餘名生擒二百四十三名追至柴城賊匪人數衆多惟恐我兵攻撲過急賊目莊大田或臨陣被殺匪夥等或乘間竄逸轉不能悉數成擒因派令穆克登阿帶領屯練降苗爲一隊許世

亨岱德帶領貴州官兵爲一隊梁朝桂張朝龍帶領廣東官兵爲一隊恆瑞王宣帶領廣西官兵爲一隊山豬毛義民副理事劉繩祖帶領粵莊義民爲一隊都司莊錫舍北路義民首黃奠邦鄭天球張元勲藍應舉各帶所管義民共爲一隊自山梁挨次排下直抵海岸烏什哈達所帶水師兵丁適值順風連檣齊至將船隻沿海密布四面合圍水陸並進海蘭察鄂輝帶同六十七袁國璜及巴圖魯侍衛奮勇往來剿殺臣福康安照料督催令各隊層層圍逼自辰至午殺賊二千餘名賊匪情急相率投海被水師兵丁放槍擊斃及投海淹殺者屍浮海面不計其數賊目等

拚死衝突不能逸出重圍俱在樹林山溝內伏匿隨督令官兵義民等分投搜捕將莊大田及有名頭目莊大韭許光來簡添德許尙等四十餘名全數擒獲並搜獲莊大田之母莊黃氏一口此外又生擒賊匪八百二十餘名柴城民人及各社生番縛獻賊匪三百餘名俱卽於軍前正法搜獲大小礮鳥槍刀矛藤牌旗幟無算查逆匪林爽文莊大田肆爲不法滋擾一載有餘茲首逆兇渠悉行俘獲卽日解京審辦盡法處治其餘零星逸匪並莊大田家屬等仍分派官兵各處搜查務期淨絕根株不留遺孽

諭曰賊目莊大田等於逆首林爽文就擒之後尙敢竄匿山林抵

死抗拒經官兵四路攻圍勢窮力蹙或竟情急自戕及投海斃命俱屬事之所有今乃負嵎死守被官兵義民層層圍逼將賊目莊大田及有名頭目悉數擒獲此皆由

上蒼眷佑將士用命而福康安等調度有方布置周密是以南北兩路賊首賊目悉就俘擒臺灣全郡平定實堪嘉獎特親解本日手帶漢玉搬指一箇小荷包一箇賜福康安又親佩小荷包一箇賜海蘭察以示優眷福康安海蘭察鄂輝俱著交部從優議敘所有許世亨梁朝桂穆克登阿袁國璜及在事出力之大小將弁等著福康安查明咨部從優議敘

恭錄

御製詩

福康安奏報生擒莊大田信至詩以誌喜

正殷捷信盼連朝忽接佳音至自遙鹿耳鯤身防海逸

莊大田在鳳山

一帶距海甚近初慮該匪情急遁入海內追捕更難得手轉不如林爽文竄至內山者尙覺人力可施也

柴城瑯嶠

獲山跳

此次福康安多方籌辦令巴圖魯等各帶官兵分隊自山梁挨次排下而烏什哈達所帶水師兵丁適值順風

連檣齊至沿海密布水陸並進四面合圍遂將莊大田及有名頭目四十餘名全數擒獲又殺賊二千餘名其餘逃入生番者被柴城瑯嶠各番社縛獻三百餘名未及兩月一之爲甚竟致南北二凶悉行俘獲全郡俱已平定實深嘉悅

再鳴旣成擒豈赦鳴永靖瀛壖揚國武益深兢業

具恩昭

閱武

輕輿清曉過南山閱武旌勞未可刪所媿躬倡

平聲未乘騎 昔年

必乘馬至教場或親御弧矢示之身先之道固應如是近以年
近八旬雖精力尚健亦宜節勞以從衆願遂乘輕輿以往究用
自媿敢忘衆力近平蠻自立香山健銳營以來屢派出征屢有
云八人前往領兵打仗後簡派巴圖魯百人隨福康安等進剿果
能迅奏膚功實爲奮勇出力然予心益深兢惕詰戎之念未敢
忘也益當克詰訓惟懋並視等差賞以頒莫謂例行託遊豫無
非事也政胥關

實勝寺疊去歲韻

實勝寺每兆實勝豪

天恩不可無記匪予始乃自

太宗松杏山攻率子弟敬述此事用此名

崇德六年八月
宗以偏師破明總督洪

承疇兵十三萬於松山杏山歸而建實勝寺於盛京以紀功績
予於己巳歲以金川凱旋亦就西山舊寺葺新之名曰實勝自
是平定伊犁回部兩金川無不名副其西域金川早如志以爲
實遠紹前光卽以敬修武備也

是後應偃武與民休息可無事不意丙午歲之冬臺灣邪教萌

逆計兩提臣乃互觀望不敢首進更退避

上年逆匪林爽文初滋事時黃仕簡任承

恩以兩提督率兵渡海若能奮勇勦殺不難立時撲滅不意黃仕簡安坐郡城任承恩株守鹿仔港以致賊勢蔓延攻城擄社日肆猖狂迨予繼命常青爲將軍過臺灣籌勦而賊衆日增已難措手非二人養癰之咎何以致此以此養癰賊

蔓延攻城擄社猖獗至更命重臣徵勁兵百巴圖魯嫺師律

客叶

夏子燭照事幾非遣重臣前往不能迅速藏事於是命福康安海蘭察等於八月初率巴圖魯百餘人帶領續調川黔楚粵勁旅萬人赴閩此百餘人素嫺師旅無不一以當百賊衆聞之已皆膽落屢戰屢勝擒二豎三月功

成亂反治

福康安等於十月底自崇武澳放洋一晝夜間揚帆達鹿仔港軍威所至勢如振槁未及三月而二豎就

擒妖氛悉靖閭郡之民咸安衽席成功之速無以逾此茲予駐蹕香山顧瞻寺額幸而無辱前名此皆仰賴是益深敬畏耳幸哉未致辱前名不然何以掩斯愧

三月二十一日陞授前鋒參領

四月十三日

諭曰此次勦捕臺灣逆匪所有派出帶兵之巴圖魯侍衛等打仗殺賊甚爲奮勇雖止係內地奸民滋事非從前平定準噶爾回部金川可比但數旬之間生擒南北兩路逆首臺灣全郡蕩平辦理甚爲迅速除軍營出力人員業經降旨加恩分別陞用外今特爾敦徹雖已賞給副都統職銜但在途病故殊堪惻憫其巴圖魯侍衛等著福康安詳悉查明如有似此實在出力勞績

懋著者據實具奏候朕降旨交部查明伊等所得功牌酌量議給世職以示鼓勵

恭錄

御製詩

福康安奏報抵廈門登岸並巴圖魯侍衛等皆平安渡海

凱旋詩以誌慰

往征進旅遲成速

福康安於上年十月在惠安縣之崇武澳候風十餘日似乎遲滯乃當此停留之際所謂

四川屯練二千廣西兵三千先後到彼而風亦旋利遂於二十八日申刻放洋至二十九日申刻所有兵船已齊抵鹿仔港因即乘銳長驅未及三月而全臺平定因迴渡登舟危得安茲又遲而轉以成速神之佑助已為鑿異

康安於回抵廈門後具奏渡海情形云於五月初十日獲有順風揚帆行至日暮抵黑水洋距澎湖內澳僅二十餘里風息不

能前進碇索長至六七十丈猶未至底難以寄泊卽在洋面往來騰蕩十二日午後風浪大作竟夜不止船隻雖覺欹側幸而安穩無虞十三日曉間卽抵大擔門所有隨從巴圖魯侍衛等俱於十四日登岸此次用兵往來配渡船隻大概俱各安順而福康安迴渡瀕危得安尤昭神護要可識臣忠亦忠信之忱得邀天佑爲之感慶

天必佑益欽

神護衆胥歡除兇旋凱事全戡吁慮宵縈念始寬自顧何脩叨

助順持盈惟勵慎君難

六月十三日

諭曰博斌等隨福康安剿捕逆匪俱能奮勇出力或於北口堵截擒殺匪衆或於南路搜拏首逆各著勞績甚屬可嘉博斌阿穆勒塔哲克翁果爾海德楞泰薩克丹布塞凌額西津泰特爾敦

御俱著加恩交該部查核伊等所得功牌酌予世襲

七月

公回京

十六日

上賜凱旋將軍福康安參贊海蘭察等宴於避暑山莊公與焉

五十四年己酉

公四十五歲

五十五年庚戌

公四十六歲

五月初四日陞授委翼長番子佐領

五十六年辛亥

公四十七歲

二月十一日陞授健銳營左翼翼長

十月二十七日公隨領兵大臣海蘭察台斐音阿岱森保
烏什哈達阿滿泰等由京起程征廓爾喀時兩廣總督嘉
勇公福康安奉

旨督辦軍務已由西甯一路赴藏矣

案魏氏源聖武紀云廓爾喀自古不通中國雍正九年乃
奏金葉表文貢方物後其三部吞并爲一遂與後藏鄰其
與中國構兵者則自五十五年內犯西藏始蓋後藏班禪
喇嘛以四十六年來朝祝
七旬萬壽中外施舍海
溢山積及班禪卒於京資送歸藏其財皆爲其兄仲巴呼
圖克圖所有於是其弟舍瑪爾巴憤懣廓爾喀以後藏之

封殖仲巴之專汰煽其入寇五十五年廓爾喀藉商稅增
 額食鹽糶土為詞與兵鬪邊唐古特兵懦不能鬪而
 朝廷所遣援剿之侍衛巴忠將軍鄂輝成德等復調停
 賄和陰令西藏堪布等歲許私幣萬五千金遠以賊虜乞
 降飾奏而諷其酋入貢受封國王廓爾喀既悔藐內地次
 年藏中歲幣復爽約於是以前責貢為名再舉深入因大掠
 扎什倫布全藏大震兩大喇嘛飛章告急時鄂輝為四川
 總督成德為四川將軍皆以罪委巴忠及奉命赴
 藏剿禦又緩程以進上知二人之不足恃也乃
 詔嘉勇公福康安為將軍超勇公海蘭察為參贊而
 調索倫滿兵及屯練土兵進討之

十一月初二日

諭曰廓爾喀賊匪滋擾後藏現派福康安帶領巴圖魯侍衛章京
 等統領勁兵進剿以期迅奏膚功福康安著授為將軍海蘭察
 奎林著授為參贊其餘隨在軍營及派往各大員俱著在領隊

上行走庶軍行有所統攝以專任使

五十七年壬子

公四十八歲

五月初六日公隨將軍福康安等抵擦木卽分隊進剿

六月公繼配博禹特夫人卒於京

初九日

福康安海蘭察惠齡奏言

臣

福康安海蘭察於四月二十

七日自第哩浪古起程前往絨轄聶拉木察看地勢仍以

濟隴爲進兵正路因卽兼程行走徑趨宗喀

臣

惠齡亦由

拉子前來

臣

等帶兵前進自過宗喀之後道路遼遠里數

加倍該處至濟隴名爲二百四十里卽有五百餘里之遙
途中山勢極爲陡峻積雪甫消溪水漲激石奔騰路徑
在懸崖之上窄處不及尺許牽馬步行處處溜滑馬匹間
有傾跌落崖者行過鄂穆暢拉扎薩拉孟底拉雜烏拉大
山十餘重於五月初六日至轄布基地方該處至擦木僅
數十里路更險峻若待各兵到齊始行進攻恐賊匪聞知
據險抵禦未免費手且_臣等自到藏以來候兵多日晝夜
籌思萬分焦急未便再有稽延應就現帶各兵先行進剿
擦木濟隴大挫賊鋒使賊衆聞風膽落查擦木兩山夾峙
中互山梁賊在山梁極高之處瞭望甚遠路徑逼仄必須

乘夜潛兵進攻方可立時奪據要隘初六日適值陰雨入
夜勢甚縣密因卽於雨夜發兵分爲五隊派哲森保翁果
爾海等帶領兩隊由東西兩山進至擦木賊寨左右山梁
堵截另派墨爾根保阿哈保等帶領兩隊亦由東西兩山
梁繞至賊後截其去路

臣

海蘭察及阿滿泰額爾登保珠

爾杭阿安祿桑吉斯塔爾等帶領一隊由正路直攻賊寨
臣福康安督率台斐英阿德楞泰等往來截殺指示攻勦
臣惠齡帶同總兵張芝元等在後路接應路中溪河數道
勢甚洶湧各隊官兵涉水徑渡遇有石礮陡險之處亦皆
攀援而上及抵擦木天甫黎明該處山甚高峻樹木茂密

山梁扼要之處前後有石礮兩座大河環繞山梁三面周圍砌築石牆卽在臨河礮上約高二丈有餘向北留門祇有一徑可上臣等恐賊匪知覺仰攻更爲費力因卽督令官兵疾速登山潛至賊寨牆外奮勇越進先開寨門官兵等一擁而入賊匪出礮抵死抗拒我兵槍箭如雨殺死賊匪一百餘名遂將前一座石礮奪據其後一座大礮在高礮之上裏外牆垣兩層用石塊堆砌上留槍眼密排木椿鹿角勢更險要賊匪見前面礮座已失東西山梁上四隊官兵亦已圍截嚴密無從逃逸因在礮內藏匿不出放槍投石併力固守臣等令官兵等進攻礮座四面賊匪俱撤

至西面抵拒隨卽將東面牆腳石塊盡力撬開立時塌一
缺口官兵等奮勇先登短兵相接殺死賊目咱嗎達杜拉
爾木等三名賊匪九十餘名賊俱退至裏層牆內潛匿我
兵乘勝直上拏獲活賊十八名俱已身帶重傷卽行正法
臣等恭秉

層謨由濟隴一路進剿大兵初次打仗將士等人人用命奮勇爭
先仰賴

聖主天威將擦木要隘賊寨立時攻克全殲賊眾事機極爲順利
可期迅速蕲事臣等現在乘勝直前進剿濟隴賊匪其聶
拉木一路業已酌遣成德哲森保永德阿尼雅布穆克登

阿彥吉保楞格等領兵丁三千名作爲偏師牽綴賊勢成
德打仗勇往經歷較多並令其酌量情形於臣等攻克濟
甯進兵後亦可乘勝直前與大兵會於陽布至絨轄地方
由窩朗卡前往山高路窄尤屬險遠卓木空山伯斯山及
達克倉濟木籠衮巴等處巨石塞路竟難行走况自絨轄
通往陽布原係僻徑並非正路不值發兵深入現在所有
官兵亦不便派撥多路轉致兵分力薄窩朗卡爲絨轄要
口不可無大員堵禦現已於該處留兵一千名酌派諸神
保帶領防守斷無虞賊匪抄截後路卽日邊界肅清之後
絨轄賊匪勢孤亦可不攻自潰查諸神保現因委催後起

各兵尙未到來成德本在第哩浪古此時先令成德移至
窩朗卡暫駐一俟諸神保趕到成德卽赴聶拉木一路會
同岱森保等進剿合併聲明

諭曰據福康安等奏官兵攻克擦木要隘全殲賊衆情形一摺首
戰得勝實賴

上天之恩欣慰之餘倍深欽感擦木地方兩山夾峙中互山梁賊
匪據險拒守拚死抵禦經福康安海蘭察惠齡等乘陰雨懸密
連夜發兵將弁官兵等鼓勇先登奪獲碉座將賊衆全行殲戮
實屬奮勇爭先勤勞倍至覽奏殊爲心惻已另降諭旨將福康
安等及帶兵將弁並出力兵丁等分別優加賞賚以示獎勵至

福康安於攻克擦木後卽乘勝直趨濟隴其聶拉木一路已遣成德帶兵作爲偏師牽綴賊勢並於緘轄要口留兵一千名派諸神保帶領防守我兵後路無虞賊匪抄截所辦皆妥總之初次打仗卽獲全勝大挫賊鋒賊匪自必聞風膽落事機極爲順利

十二日

福康安海蘭察惠齡奏言

臣

等進兵以來仰賴

天威連得勝仗賊匪富屢敗之餘業已聞風膽落陽布援兵不能趕到必須乘勝直前迅攻濟隴庶可一鼓克復不致久延時日五月初九日躡看道路形勢查得濟隴官寨高太寬

廣原在山崗上砌築石牆甚堅賊匪復週圍疊石爲壘高
及二丈密排鹿角椿木爲守禦之計又在官寨西北臨河
砌大礮一座直通官寨爲取水之地官寨東北在石上砌
大礮一座倚石爲固官寨東南山梁甚陡另砌石礮一座
賊匪分據險要負隅固守山下喇嘛寺與石礮斜對亦有
賊占據臣等屢奉

訓諭務令加意慎重斷不可越過濟隴別尋間道而官寨層礮高
聳形勢險固各處礮卡賊匪又可互相援應共成掎角之
勢臣等再四籌思應於進攻官寨時分遣兵丁攻撲使之
處處受敵彼此不能相顧將各礮卡賊匪殲除淨盡然後

併注官寨一處賊匪勢孤自必立時潰散因令巴圖魯侍衛章京屯弁等各督官兵分路攻取派巴顏泰巴顏察薩甯阿長春等往攻臨河碉座桑吉斯塔爾克色保籌保巴哈張占魁等往攻石砌碉座哲森保墨爾根保翁果爾海阿哈保納丹保德勒克依雅爾哈善富永劉懷仁金川屯備散秩大臣銜木塔爾巴底土弁占布木巴旺土弁阿達革布什咱土弁索諾木敦珠等四面往攻山梁上碉座蒙興保綽爾渾額爾金保扎爾德甯等攻取喇嘛寺阿滿泰額爾登保珠爾杭阿吹扎布溫春哲克溫保張志林屯土備弁木泰爾色穆哩雍中等往攻官寨

臣福康安帶領烏

什哈達安祿定西爾穆克昇額永善張芝元達音泰巴塘
副土司成勒春丕勒等相機調度督催各路攻取官寨
惠齡帶兵往來策應其山麓稍平之地臣海蘭察率同台
斐英阿德楞泰阿木爾塔阿納保鄂尼保巴津達爾等帶
領索倫騎兵分爲兩翼以備截殺逸匪分派各隊已定惟
查通往各碉卡之路皆距官寨不遠賊匪據高望見槍礮
可及因潛於初十日丑刻發兵令各路同時並進哲森保
等搶上東南山梁賊匪在碉內死守我兵奮勇攻圍爭先
上碉賊始拚命撲出臣海蘭察率領台斐英阿等帶兵復
往來衝擊殺賊甚多我兵卽將山梁占據蒙興保等亦同

時攻得喇嘛寺巴顏泰等進至臨河礮下賊匪因係取水要隘恐官兵斷其水道抵禦甚堅槍斃賊匪多人尙敢抗拒隨將攻克山梁兵丁撤下添往協攻並用礮轟擊礮座塌去一角賊匪紛紛跳下大河淹斃登岸逃遁者俱被索倫騎兵截殺其石砌礮座距官寨較近桑吉斯塔爾等帶兵攻撲拋入火彈焚燬上兩層將賊焚斃惟下層迴圍皆係整塊巨石高寬數丈官兵攀援登礮而石塊陡滑不能卽上賊匪猶藏匿礮座下層向外放槍實屬懸不畏死火力延燒直至日暮始行燒塌僅贖賊匪二名冒火竄出卽被拏獲其派攻官寨之阿滿泰等進撲數次未能得手隨

焚燒寨下房屋乘勢進攻官寨賊匪見我兵奮勇直前槍
箭如雨在石壘跼立不定俱退至寨內放槍投石抵死守
禦復令各路官兵全行撤至官寨併力進攻並於臨河礮
座及賊匪砌砌大石上設礮對官寨礮眼並瞭望窗內兩
面轟入另縛大木爲梯令屯兵蟻附而登將官寨外石壘
拆毀而寨牆甚堅不能卽時摧破自丑刻進兵直至戌刻
我兵攻戰一日人人鼓勇午後密雨半日官兵冒雨攻圍
倍加振奮並未稍形疲乏天色向暮雨益傾注本應令各
兵休息但當屢勝之後正應乘此銳氣將濟隴立時克復
未便予賊以修備之暇因復催兵連夜進攻至亥刻將官

寨東北隅攻破西南一面俱係石崖賊匪滾山逃竄我兵盡力窮追痛加截殺此次打仗共殺賊六百四十七名呈驗首級內大小頭目七名其投河落崖及在礮寨內傷斃不及割取首級者尙不在此數內拏獲活賊一百二十三名派兵搜山又搜獲逃匿活賊七十五名訊非要緊之犯酌留五名備訊路徑其餘均卽正法伏查擦木至濟隴地方扼塞險要賊匪自上年占據屯聚備禦甚堅臣等帶兵前來察看情形勢須迅速進兵方可連奪要隘一舉收復不能待後起兵到來始行進剿是以就現帶索倫達呼爾屯土各兵奮勇直前於四日內痛殲賊衆連戰皆捷將擦

木至濟隴邊界克復此皆仰賴我

皇上先機指示以濟隴進兵爲正路應將濟隴先行收復大兵直搗陽布方無後顧之虞

睿訓周詳

臣

得以欽遵辦理迅報捷音曷勝欽感欣幸之至再查

濟隴西南熱索橋相距八十里卽係賊境

臣

等雖已克復

濟隴但尙係西藏地方現在查探道路整頓兵力卽行設法奪橋進攻賊境並嚴催後起德爾格綽斯甲三雜谷等處兵丁迅速前來卽行帶領進剿其軍火弓箭餉銀等項雖不能待川省運來者應用亦須將

臣

福康安在藏購辦

鉛藥礮位糧石及帶來弓箭運到濟隴以資接濟

諭曰福康安等奏大兵克復濟隴痛殲賊匪一摺覽奏欣慰不禁以手加額叩謝

天恩福康安之摺係五月十一日所發距今計已一月濟隴爲進兵要路一得此處軍威大振必當勢如破竹此次官兵冒雨攻圍人人鼓勇可憐可嘉而福康安等分兵攻撲使賊不能相顧是行軍正策一切布置調度俱合機宜著賞福康安本日御製攻克濟隴誌喜詩書扇一柄御用大荷包一對小荷包四箇鼻煙壺一箇小刀一把火鑷袋一箇海蘭察惠齡各賞大小荷包鼻煙壺小刀火鑷袋用示優眷其打仗出力將弁已另降諭旨分別擢用加恩賞巴圖魯名號官兵賞給一月錢糧統俟大功

告嚴凱旋宴勞再沛酬庸之典

十九日

福康安海蘭察惠齡奏言查濟隴西南山勢愈窄道路愈險兩山之間有藏地流出大河一道各處溪河皆匯歸下注水勢洶湧通往賊境之路唯熱索橋爲扼要之地臣等於克復濟隴之後整頓兵力五月十三日起程前進兩面高山夾峙石崖壁立俯臨大河緣山一線窄徑亂石崎嶇步步陡折並有大石直礮高至丈餘者其兩崖高峻不相連屬處所橫架獨木偏橋攀藤而過幾無置足之地是日正值大雨泥湍溜滑尤屬難行人馬均有傾跌落崖者道

里甚長名爲七八十里卽有一百三四十里之遙步行一晝夜於十四日黎明始至擺馬奈撒地方距熱索橋尙有十餘里探得該處有大河一道自東來會注正河過河卽係賊境賊匪過河浮搭木板爲橋並於北岸三四里外索喇拉山上砌石卡一處南岸臨河砌大石卡二處據險拒禦_臣等帶領巴圖魯侍衛及索倫屯土兵丁至索喇拉山直前攻撲賊匪抵敵不住棄卡奔逃我兵沿途追剿有逸賊數名甫上熱索橋其南岸守橋賊匪見官兵追至不及待其過橋倉猝撤去橋板俱卽落河淹斃我兵一到卽一面伐木預備搭橋一面施放槍礮隔河擊賊無如河面寬

闊水深溜急賊匪阻河抗拒槍聲不斷而北岸山境極狹
竟無多兵駐足之地若徑對賊卡進攻與賊相持徒費兵
力急切不能得手因將各兵暫撤十五日寅刻派兵仍至
河邊作爲欲進之勢密遣阿滿泰哲森保墨爾根保翁果
爾海等帶領屯土兵丁令由東面裁緣大山繞至上流潛
渡查裁緣山與濟隴熱索橋一帶大山連接峻嶺巉巖樹
林茂密陡險之處有一線僻徑可上我兵越過兩重大山
已至熱索橋上游距橋尙有六七里當卽砍伐大樹紮爲
木筏渡過南岸沿河疾行直撲賊卡賊匪祇在正路拒禦
不知別尋間道一見官兵驟至出卡抵禦殺死賊匪數十

人隨即推倒頭層石卡所有正路官兵爭先乘勢搭橋一時並濟復將後層石卡奪據賊卽紛紛潰亂拋棄槍刀倉惶奔竄而該處路徑險仄擁擠不開賊匪自相踐踏滾跌落河官兵復奮勇進剿直至賊境色達木地方已過熱索橋三十餘里沿途痛殲賊衆復擒獲活賊達爾拉木塔巴等八名詢以濟隴被官兵攻破後官寨賊匪於初十日夜間奔竄由熱索橋逃回者共有若干據供濟隴地方我們頭人兵丁甚多管兵的是三箇蘇必達初八日頭人們差兩箇兵趕回陽布從橋上經過說是大兵來了連夜回去請發救兵自初十日以後總沒見有逃回去的人大兵打

破濟隴官寨我們在橋上還不知道信息我們派來守橋
已有三箇多月等語詳核賊匪所供是濟隴屯聚賊匪被
官兵殲除淨盡茲又將熱索橋設法攻得已據賊境門戶
從此相機深入定能迅搗賊巢唯是前途山路險仄更甚
官兵魚貫而進併少割營之處而兩邊山上如塔木那等
處又有旁出小徑通往賊中亦應酌量留兵嚴防賊匪抄
截後路現在探明路徑妥爲布置慎重前進詎等仰蒙

聖恩委以統兵重任敬惟

皇上宵旰焦勞廛籌軍務固不敢稍涉稽延又疊蒙

訓示諄諄

諭令加意慎重亦不敢因屢得勝仗輕率冒昧總期全師克捷藏
事完善上慰

聖懷

諭曰福康安等奏攻克熱索橋進臨賊境一摺覽奏欣慰濟隴以
外高山夾峙窄徑崎嶇較金川尤爲險阻賊匪恃險拒守放槍
抵禦福康安等抵熱索橋時因與賊相持急切不能得手隨暫
撤各兵繞越兩重大山在熱索橋上流潛渡乘其不備直前攻
撲痛殲賊匪奪據石卡所辦深合機宜可嘉之至該處爲賊境
門戶今已乘勝攻克統兵深入勢如破竹自早直搗賊巢著賞
給福康安洋表一箇大荷包一對小荷包四箇海蘭察洋表一

箇大荷包一對小荷包二箇惠齡洋表一箇大荷包一對小荷包二箇用昭優眷並發去翎管十箇大小荷包各十對交與福康安等查明遇有帶兵出力之侍衛章京將領等酌量賞給所有此次帶兵繞道渡河殺賊之巴圖魯侍衛等實屬奮勇出力除阿滿泰已於上次打仗得勝加恩以副都統卽補外前陞頭等侍衛之翁果爾海頭等侍衛哲森保俱著賞給副都統職銜墨爾根保著陞爲二等侍衛兵丁等亦著查明共有幾人一體加賞以示獎勵其攀援獨木偏橋前進之兵丁如有跌斃者亦著查明咨部照陣亡例議卹至成德岱森保等前經福康安等派在聶拉木一路牽綴賊勢今經福康安等行知令其酌量進

攻卽於十二日分路前進占住德親鼎山攻克頭卡槍斃賊匪
多人將二卡三卡俱行攻克焚燬木柵搭橋前進亦屬奮勇可
嘉並著福康安等查奏打仗出力者酌加獎賞以示鼓勵

三十日

福康安海蘭察惠齡奏言臣等帶兵於本月十五日奪據
熱索橋已至賊境十七日進至密哩頂地方山徑愈覺逼
仄陡巖高礮亂石叢積日越大山數重竟無路徑一面帶
兵行走一面令烏什哈達張芝元督兵修路前進十八日
行抵旺噶爾地方一路山勢險峻自藏流出瑪爾臧大河
傍山南注人行大河之東緣山順河並無容足之地不能

劄營臣等帶領巴圖魯侍衛官兵俱在石巖下露宿賊匪亦因沿途無駐足據守之處故深入賊境一百六七十里未見一賊但恐賊匪於隱僻地方埋伏差人密加偵探查得旺噶爾西南協布魯一帶地方有賊匪砌卡屯聚隨於十九日五鼓前往察看形勢該處當路有橫河一道水深溜急自東來匯注瑪爾臧大河與熱索橋形勢相似而山險尤甚原有橋座業被賊匪拆燬河岸之北地名旺堆山坡低下河岸之南地名協布魯克瑪山坡極高賊匪在南岸高礮上樹立木城城外圍築石牆堵截正路又於木城西南里許協布魯地方臨瑪爾臧河築卡據守隔河對岸

亦砌賊卡又有賊寨數座名克堆寨在協布魯克瑪山東三十餘里高據橫河上游各寨內賊匪頗多二十日臣等帶領兵丁至旺堆砍伐大樹試往搭橋賊匪居高臨下在木城內施放排槍橋座不能搭起隨派兵在山上用礮轟擊木城打死多人賊匪猶不敗退木城石牆隨破隨修拒守甚堅二十一日復往攻擊仍不能搭橋渡河臣等以賊匪所拒之處甚得地勢一時難以攻克必須先將克堆寨攻破奪據上游從東面山上壓下另派台斐英阿等帶兵回至旺噶爾塔橋渡過瑪爾臧大河由薩木那翻山行走直至協布魯對岸進攻賊卡夾擊西面則協布魯克瑪一

帶賊匪亦可不攻自潰二十二日酌令臣惠齡帶同額爾

登保等仍由正路進攻牽綴賊勢臣福康安海蘭察卽一

面往攻克堆賊寨因沿橫河東上無路可通隨越過伯爾

噶臧興三重大山攀陟險阻於二十三日黎明繞至橫河

上游北岸其時克堆各寨內賊匪俱在隔河抵禦槍礮甚

多該處河道寬深又因連日大雨山水漲發溜勢更急舊

有橋座併兩岸搭橋基址均被賊匪拆燬無存適見南岸

有極大枯樹一株倒入河中尙不能接至北岸相離幾及

三丈因督令各兵另伐大木接於枯樹之杪借搭爲橋我

兵奮勇直前無如賊匪槍聲不斷無暇繫縛堅固而河內

多係巨石橫亘中流漩渦急溜激石奔騰水力甚大甫將
大木接上卽被漂去旋入石罅中折斷如此十餘次未能
卽渡日暮大雨陽令各兵撤退伏於石礪樹林之內候至
夜半賊匪俱各回寨卽趕緊接縛大木緣木過河遙望克
堆寨在兩山中間石岡之上地勢頗高僅有一徑可上當
路火光數處係賊匪瞭望卡隘臣恐仰攻徒費兵力因令
桑吉斯塔爾守橋另分兵爲三路鄂尼保克昇額等繞上
賊寨後山梁哲森保翁果爾海等前往接續阿滿泰珠爾
杭阿達音泰定西甯順山進攻臣海蘭察帶領巴圖魯侍
衛等潛過山溝繞上對面山梁臣福康安帶領安祿德楞

泰及巴圖魯侍衛等督催官兵於二十四日黎明併力壓
下賊匪見我兵全已渡河出其不意抵禦不住紛紛潰亂
各路官兵盡力追剿殺死賊匪三百餘名焚燬賊寨五座
徑趨協布魯克瑪其台斐英阿阿甲等一路亦由薩木那
翻山前來攻克賊寨從西面夾擊所有協布魯克瑪及協
布魯屯聚賊匪見官兵各路壓下全據勝勢均棄木城石
卡奔逸復被我兵邀截殺死賊匪二百餘名旺堆正路官
兵亦卽乘勢搭橋過河占住賊卡追殺賊衆數十餘名此
次進攻協布魯一帶地方極爲險要賊匪拒守甚堅若不
設法出奇非數旬不能攻克臣等仰仗

聖主天威激勵將士巴圖魯侍衛官兵等爭先用命搭橋過河於峭壁懸崖深林密箐人迹不到之處黑夜冒雨攀援登陟衣履皆穿手足擦破並未稍形退怯實爲奮勇出力臣等惟有帶領勁兵直前攻勦迅掃賊巢以期早慰

聖懷

諭曰福康安等奏攻克協布魯一帶木城賊寨打仗得勝情形一摺官兵自過熱索橋後所經地方陡巖高礮亂石叢積無平地可以割營福康安等與所帶官兵至於露宿實甚勞苦至不忍觀其協布魯一帶極爲險要賊匪憑河阻抗撤橋固守福康安等復設法出奇乘其不意於雨夜迅速潛渡將賊匪痛加殲戮

焚燬卡寨巴圖魯侍衛官兵等俱爭先用命於人迹不到之處
攀援登陟衣履皆穿手足胼胝並未稍形退卻用兵以來從無
似此之難者欣覽之餘益加憐憫官兵深入賊境連次克捷福
康安等調度督率悉合機宜今賞福康安御用大小荷包四喜
搬指鑲嵌松石翎管海蘭察惠齡各賞給大小荷包四喜搬指
鑲嵌松石翎管用昭優眷外發去四喜搬指六箇鑲嵌松石翎
管十七箇著福康安等酌量帶兵大員內如台斐英阿等何人
最爲出力者傳旨分賞又鼻煙壺小刀各四十件並著福康安
等遇有帶兵出力之侍衛章京將領等酌量賞給以示獎勵

七月十四日

福康安海蘭察奏言竊

臣

等攻克協布魯一帶地方業經

恭摺奏

聞查協布魯至東覺須由噶多前往噶多距協布魯約有百十里
該處山徑叢雜處處相通大兵一過恐賊匪從中邀截卽
得東覺終有後顧之虞現在打仗官兵將及六千名勢不
能再行留兵抵禦臣等察看情形密探路徑自噶多正路
至作木古拉巴載山梁二十餘里山下又有橫河一道隔
河對面大山卽係東覺爲賊境險要之地賊匪據險設備
前後高下分布頗爲聯絡自噶多東南越山至雅爾賽拉
博爾東拉一帶大山亦有賊匪多人屯聚該處係屬間道

與正路互爲掎角最關緊要臣等公同商酌所有雅爾賽

拉博爾東拉一路

臣

海蘭察前往攻剿帶領巴圖魯侍衛

章京索倫屯土官兵分作三隊桑吉斯塔爾翁果爾海鄂
尼保阿哈保等爲頭隊阿滿泰哲森保溫春富禮善溫保
爲二隊珠爾杭阿墨爾根保納丹保富僧額多爾濟達音
泰爲三隊金川屯備木塔爾等卽派三隊之內因此路極
爲險遠將前隊官兵先行進發臣海蘭察於七月初三日
起程督催前進其東覺一路臣福康安帶領巴圖魯侍衛
章京索倫屯土官兵等前往攻剿亦於初三日起程臣福
康安先至作木古拉巴載山梁望見隔河東覺山巔賊寨

賊營甚多半山以下俱有木城石卡臨河砌築堵截正路兩山南北夾峙壁立數千仞下視橫河僅如一線雖濟隴以外沿途山勢已極逼仄然賊匪據守卡寨及渡河處所尙畧有偏坡總未有如此地險峭高峻者若帶兵直下至山根渡河卽有二十餘里之遙賊匪槍礮處處可及斷難從此徑渡探得上游噶多普大山係橫河來源其水稍淺山路亦稍曲折雖對面河岸亦多礮卡防守甚嚴而噶多普山上巨石林立樹木茂密尙可藏身徐下因留合斐英阿蒙興保圖爾岱薩甯阿巴彥泰巴哈等駐兵作木吉拉巴載山梁暫緩下山進攻仍用大礮晝夜轟擊使賊匪抵

禦正路官兵不得稍息

臣

福康安卽帶領額爾登保安祿

張芝元德楞泰克昇額五紹定西鼎綽爾渾克色保諾托
保雙福富永屯備色穆哩雍中朗爾結等由山嶺重疊之
處潛往噶多普繞行兩日初五日黎明帶兵下至半山臨
河石卡內賊匪一見官兵先行出卡放槍抵禦我兵且伏
且行於初六日下至山麓浮水渡河礮內賊匪亦盡出抵
禦當卽督率官兵一面奮勇勦殺一面將近河各礮卡奪
據而上面陡礮尙有木城層列石卡亦多賊匪見近河礮
卡已失卽從陡礮上繞來攻撲我兵奮力勦殺將帶領匪
衆頭目臨陣擒獲餘衆始行敗回隨卽催兵直趨頭座木

城屯兵數人鼓勇先登被刀砍傷各兵並未稍卻攀援繼上立時攻克其二座木城賊匪俱卽出至樹林內攢集吹號吶喊乘高而下而木城兩旁石卡內賊匪亦來邀截我兵毫不退卻分投接戰攪殺一處不及放槍惟用弓箭刀矛將賊匪殲戮殆盡山嶺營寨內賊匪聞知趕來援救行走捷速甫至半山復被官兵截殺其台斐英阿等在山梁上連日用礮轟擊打死紅衣綠衣賊目及賊兵多人探知大隊官兵已由噶多普渡河得勝亦卽乘勢由正路下山搭橋過河將正路之木城石卡攻得前來鼓勇登山追奔二十餘里遂將賊寨賊營全行克獲共攻克大小賊寨十

一處賊營三處石礮四座木城五座石卡二十餘處殺死賊目蘇必達奈新一名蘇必達巴撒喀爾一名哈瓦達三名咱瑪達二名賊匪四百餘名滾崖落河者不計其數掣獲大賊目薩爾達爾巴載巴拉哩一名活賊七十六名臣海蘭察分路後繞行雅爾賽拉博爾東拉各山極爲高峻林深箐密毫無路徑連日潛伏步行冒雨登陟晝夜遄行至博爾東拉前山遙見木城三座石卡七處當路砌築頗得地勢若卽直前攻撲未免徒費兵力隨於初六日黎明徑登山巔繞至賊卡之上前隊之翁果爾海等正擬壓下賊匪已蜂湧前來勢甚潑猛竟敢迎頭衝突二隊之阿滿

泰等三隊之珠爾杭阿等亦卽接續前來

臣海蘭察帶領

巴圖魯侍衛及索倫屯土各兵奮勇勦殺槍箭並無虛發

自卯至午往返追壓十餘次在前賊匪甫被擊退在後紛

紛接應拚命競進短兵相接賊屍縱橫徧地殺死賊目蘇

必達那塔新巴一名咱瑪達二名賊匪二百餘名始行敗

竄當將木城石卡全行拆燬整隊前進行至瑪木拉復遇

埋伏賊兵堵截去路

臣

海蘭察於高處望見卽督率巴圖

魯侍衛章京等直前迎擊又殺賊百餘名維時東覺餘賊

業已敗竄

臣

海蘭察卽由博爾東拉山梁趕下

臣

福康安

會合一處帶兵盡力追勦賊匪繞山越嶺行走官兵跟蹤

搜捕沿途多有斬獲茲於初九日趕至雍鴉地方對面噶勒山梁上先有接應賊匪據險設防屯聚拒守本應卽日進攻但各兵登山陟險打仗追賊晝夜辛勤已經八日履襪擦損跣足徒行爲石棱擦傷螞蝗嚙兩足多已腫痛且賊境天氣陰雨最多每日惟辰巳二時稍霽交午卽雲霧四合大雨如注山巔氣寒入夜雨皆成雪兵丁昏夜登山遇有數丈石礪攀援樹枝始能跳越上下一經雨雪尤屬溜滑難行隨帶弓箭多致跌折鑼鍋帳房更不能攜往裹帶糈粃又已食完必須休息數日稍養兵力並嚴催糧石鉛藥弓箭到來分別給散方可整兵進剿查賊匪素恃

險遠滋擾各處頗諳攻戰大兵直入賊境後屢次克捷賊匪尙思抗衡未形畏懼今進攻東覺博爾東拉險要之地各處礮卡營寨木城據險密布甚得地勢賊匪屯聚甚多據守甚固我兵共有數千名後路並無接應勢難剋期取勝是以臣等於發兵時宣諭我

皇上撫卹士卒

深恩加以激勵官兵等無不倍加感奮勇往爭先屢經賊匪迎撲我兵屹立不動槍箭如雨殲擒匪衆俱係壯大兇橫之人而各礮卡木城內賊匪並不藏匿死守悉皆空壁而出希圖抵禦竟得以派兵一面攻擊一面奪據不煩逐處攻圍

久延時日此皆仰賴

聖主洪福將士用命於萬難攻勦之時竟獲全勝

臣等親在行間

實深欣感

八月初九日

福康安海蘭察奏言

臣

等自濟隴進攻賊匪恃其山勢峻

險河流洶湧徧處疊立戰礮木柵決斷橋梁盡力固守是以每逢打仗必由遠道遠進攀陟懸崖始可攻殺賊匪衆巴圖魯侍衛官兵等分路撥派冒雨登險奮勇爭先將熱索橋協布魯博爾東拉東覺等處克獲賊礮殲擒賊匪甚多此皆仰賴

天威洪福各巴圖魯侍衛官兵等感激

聖恩竭力報效理合據實奏

聞懇乞

皇上加恩鼓勵謹將著有勞績人等分繕清單進

呈

諭曰福康安等奏請將熱索橋協布魯博爾東拉東覺等處打仗奮勉弁兵加恩鼓勵一摺此次攻克熱索橋巴圖魯侍衛官兵冒雨涉險踰越山梁奪取碉卡實爲奮勇可嘉護軍統領台斐英阿著賞給都統銜頭等侍衛額爾登保珠爾杭阿健銳營翼長德楞泰著賞給副都統銜其餘均賞賚有差以示朕軫念戎

行普行施惠至意

二十一日

福康安海蘭察奏言查賊匪將從前裹去兵丁噶布倫等全行送出遣大頭人來營具稟乞降經_臣等嚴檄飭該當令明穆幾爾幫哩等二人回巢諭知賊酋卽行親來並令將前途各山梁拒守賊衆全數撤回若稍有支吾仍卽統兵進剿茲距發檄之後又經數日各山上拒守賊衆尙未撤動賊酋等亦無親來之信自仍當相機進取官兵自到雍鴉以來已經兩旬後起川兵尙未到來亦未便稽延坐守况藏地邊界雪下最早如宗喀通拉山等處常年八九

月間卽已大雪封山今年節氣較早已交秋令十餘日總
須趕封山之前蕺事撤兵不能久稽時日臣等再三籌畫
察看形勢經過賊境地方數百里內大山皆係東西對峙
中夾大河官兵屢次攻賊皆繞道上至東山之巔從上壓
下勢若建瓴而自過雍鴉以南山勢皆南北相向如噶勒
拉堆補木甲爾古拉集木集大山層疊橫互陡峻異常而
堆補木與甲爾古拉兩山之間又有橫河一道我兵由山
北徑上步步皆須仰攻若攻克噶勒拉堆補木兩重大山
須卽奪橋過河方能得勢臣等帶領桑吉斯塔爾墨爾根
保張芝元德楞泰克昇額達爾精阿薛大烈屯備朗爾結

等擬由中路前進直至噶勒拉山麓作爲上山之勢誘賊
下壓另派額爾登保七十五額爾金保定西鼐五紹張志
林等由左一路進攻珠爾杭阿阿哈保圖爾岱達音泰張
占魁屯備色木哩雍中等由右一路進攻俱令乘夜進兵
於樹林內潛身而上俟賊匪下至半山兩路官兵卽疾上
山巔奪據賊卡分派已定臣等於初二日丑刻先將兩路
官兵進發卽親督大隊於黎明越過雍鴉大山徑下山溝
遙望噶勒拉山巔有木城兩座木城內賊匪尙未敢遽行
迎敵臣等督率官兵分爲數隊陽欲覓路分上賊匪自恃
山險徑從高處壓下勢甚潑猛而左右兩路官兵已於樹

林內繞出其上奮勇登山分趨東西賊卡賊匪不虞官兵驟至立時潰亂將石卡兩處全行奪據其中路迎來賊匪行至半山見山上山下俱有官兵不能進退臣等卽以鳥槍弓箭兵丁排列在前徑行撲上賊匪正在驚懼之際抵敵不住逃回木城我兵跟蹤追上又見先上之兩路官兵從左右夾擊賊匪在木城放槍投石迎拒甚力木城係大木豎立用竹篾藤條繫縛堅固

乾清門侍衛墨爾根保侍衛圖爾岱參將張占魁攀援木城徑上中槍陣亡我兵並不退怯分投攻勦拋入火彈焚燒木城內草棚帳房自辰刻直至未刻攻克木城兩座又連

克石卡二處殲戮賊目五名賊匪三百餘名落崖者甚多
隨將木城焚燬乘勝窮追數十里直至堆補木山口象巴
宗地方該處有賊卡一處山上有木城兩座木城旁又有
石卡三處大石卡一處敗逃餘賊未及全過象巴宗我兵
趕及卡內賊匪棄卡奔逸衆兵齊上山巔木城賊匪俱出
抗拒其木城旁石卡內賊匪拒守不出隨令桑吉斯塔爾
袁國璜英貴薩甯阿綽爾渾籌保達音泰等進衝賊陣阿
木爾塔額爾金保綸布春索多爾海富蘭劉懷仁魏玉龍
巴底大頭人松飛巴塘副土司成勒春丕勒等分攻賊卡
臨陣殺死賊匪一百餘名連奪賊卡復派屯兵等爬越大

石卡圍牆奮勇攻克餘衆奔潰惟巴圖魯三等侍衛索多
爾海都司魏玉龍於奪卡時因槍傷落崖身故其時已及
半夜本應稍爲休息但堆補木山下帕朗古地方卽係橫
河現有賊匪據守橋座若不將橋奪據賊匪循河東上卽
可繞出我後况堆補木南面較北面山勢稍有偏坡阻河
爲固方可將堆補木守住隨連夜分兵兩路派珠爾杭阿
安祿七十五蒙興保穆克登布富禮善榮義馬登榮屯備
木泰爾朗爾結等由橫河上游進攻集木集阿滿泰額爾
登保袁國璜阿木爾塔達爾精阿定札永善棍德依雲保
森伯鼐屯備木塔爾斯丹巴等由帕朗古攻橋進撲甲爾

古拉於初三日卯刻至橫河北岸臣等以該處橋座最關緊要當卽帶兵前進督率攻取賊匪於橋座南北兩岸圈砌石卡過河卽係甲爾古拉大山與集木集大山連屬山梁自東至西橫長七八十里木城礮卡據險排列不下數十處儘西山腿有木柵一座約長數里守禦極爲險固臣等帶領官兵進攻橋座北岸卡內賊匪拚命抵禦我兵奮勇攻撲於高礮上用槍礮向下轟擊自辰刻攻至午刻卡內賊匪大半槍斃站立不住逃遁過橋南岸賊匪排槍數層連環不斷一面抵住我兵一面卽欲拆橋已將橋板撤去數塊惟恐橋座拆斷過河愈難阿滿泰等直前爭奪兵

丁乘勢競進一擁過橋阿滿泰及屯備色丹巴在前行走適中槍傷落水身故其時兵已搶至南岸將賊卡攻得殺死賊目三名賊匪一百餘名沿河賊匪敗竄上山我兵卽追躡賊蹤往攻甲爾吉拉其橫河上游一路珠爾杭阿安祿等見正路官兵已過亦乘勢搭橋渡河進攻集木集臣等卽帶兵過橋督率兩路官兵奮勇前進適值大雨傾注山崖險滑直上二十餘里將近木城形勢更陡賊匪居高臨下槍礮甚多我兵仰攻又無大石密樹可以藏身不能立時攻克當將官兵撤至山下賊匪乘高撲來巴圖魯侍衛章京及官兵等人人奮勇趕上接戰攪殺一處殲殺甚

多集木集山梁上賊匪從旁抄下接應欲來奪橋而橫河
歸入大河之處復有賊匪在大河隔岸放槍助勢三路之
賊不下七八千人我兵往來攻擊賊匪仍不敗退臣等隨
親率台斐英阿張芝元德楞泰七十五紹英貴克昇額
札保富罕雙甯定西甯德清額屯備阿忠安普木等奮勇
衝殺賊稍退卻台斐英阿等出隊直前射死紅衣賊目二
人台斐英阿及二等侍衛英貴索倫佐領棍德依旋中槍
陣亡因將各兵分隊排開四面圍截復殺死賊目三名賊
匪一百六十餘名餘賊紛紛竄逸又拏獲活賊十七名我
兵追至山麓始行撤回此次進攻接戰兩日一夜連克兩

重大山大木城四座石卡十處大石卡一處奪據帕朗古
大橋一座官兵並未稍爲休息攀援險阻衝冒槍石奮不
顧身殺死賊目十三人賊匪六百餘名拏獲活賊十七名
訊明俱已正法賊匪當屢次敗衄之餘復經此次痛加殲
戮自必更形畏懼伏思廓爾喀自恐滅亡處處負嵎據險
今官兵追逼更近已過帕朗古大橋與賊營對山駐劄較
雍鴉地方復深入七十餘里賊匪備禦益加嚴密所謂困
獸猶鬪自不肯束手待斃然賊匪震懾軍威僅能據險自
守卽人衆較多亦不敢前來窺伺臣等再當酌量情形相
機辦理至後路一帶因續調川兵未到祇於塔木那及協

布魯博爾東拉酌留兵丁防守今官兵又已深入自濟隴至軍營後路約有數百里道里縣長應於東覺雍鴉及清吉札喇果臧果橋上各要隘添安兵丁數十名至百餘名不等庶聲勢稍爲聯絡沿途糧運軍火亦可藉資防護

諭曰福康安等奏攻克噶勒拉堆補木奪橋過河打仗殺賊情形一摺可嘉之至據稱藏地邊界雪下最早如宗喀通拉山等處常年八九月間卽已大雪封山今年節氣較早總須趕封山之前藏事撤兵不能久羈時日等語所見與朕同前恐藏內氣候驟冷若非及早竣事撤兵或爲大雪所阻屢降旨令福康安等臨機應變安速藏功今福康安等摺內已籌計及此朕心轉爲

稍慰前經福康安等遣朗穆幾爾幫哩等二人回巢諭知賊酋將各山梁拒守賊衆全數撤回乃發檄之後又經數日各山上拒守賊衆尙未撤動若福康安等仍按兵不動未免爲賊所輕自以進攻爲是各官兵分路攻剿攀援登陟雖見有中槍陣亡者並不退怯仍奮勇直前拋擲火彈痛殲賊衆將噶勒拉堆補木石卡木城全行占奪實屬可嘉可憫幾於不忍披閱此次阿滿泰墨爾根保等皆中槍陣亡尤堪軫惜嗣後與賊接仗所有得力之巴圖魯侍衛等不可復使冒險輕進致有傷損並著傳諭福康安等如此旨到時尙在相機進取則賊匪經官兵連次痛殲之後早已望風膽落必另差人赴營遞稟乞降福康安等

即可趁其畏懼哀懇傳旨允准現爲節候所限亦不得不如此辦理福康安等受恩深重厯經委任定能籌畫萬全安速藏事至額爾登保珠爾杭阿德楞泰已賞給副都統銜此時帶兵之人額爾登保等卽令作爲領隊所有打仗之官兵士兵已明降諭旨賞給一月錢糧成德一路賞給半月錢糧以示獎勵

十月二十六日

福康安惠齡奏言

臣等前奉撤兵

諭旨卽遵

旨檄諭賊酋派委翼長德楞泰帶同普都爾幫哩乃爾與至熱索橋邊界飭令回巢

臣

等卽於十五日自濟隴帶兵起程旋

據德楞泰帶送賊目前赴邊界飭令回巢訖該翼長於十七日趕至工達地方臣等面稟據普都爾幫哩乃爾興於途中稟稱此次廓爾喀誠心歸順已荷

大皇帝格外天恩准令頭人等進京瞻

覲頭人到京時仰蒙

大皇帝加恩必應具

表恭謝方可稍盡微忱隨

表貢物不敢似五十五年謝

恩貢物簡畧該翼長本未知有五十五年進

貢之事隨答以

天朝撫馭萬邦厚往薄來原不在此區區

貢品但爾部落既欲誠心效順感戴

聖恩在爾部落自當如此等語臣等查上次廓爾喀投誠並未呈

遞謝

恩貢物何以賊目復有此語因思前藏貿易之巴勒布商人巴凌

覺前經

奏明帶來現在軍營隨將此事密詢據稱五十五年多喇拉

木來藏曾齎謝

恩表貢聞得交存巴勒布買賣人處不知詳細等語臣等聽聞之

下不勝駭異伏查上次賊匪遣多喇拉木等來藏求

賞俸祿地方未經普福俘習渾雅滿泰具奏已屬荒唐今復查出廓爾喀曾有謝

恩表貢交存在藏事關邊界具表駐藏大臣竟敢匿不具奏其故更不可解查普都爾幫哩等在營多日從未稟明此事茲於回巢時間中提及以見其向來恭順又詢據巴凌覺亦稱實有其事雖_臣等從前研詢丹津班珠爾等時祇供有賊匪求

賞俸祿地方差人來藏並未供出帶有謝

恩表貢然該犯等彼時正爲噶布倫斷無不知之理解京訊問自可水落石出況此項

表貢旣在巴勒布貿易人處無難卽行查出臣當卽密寄和琳就近先將

表文貢物嚴密查出據實辦理復思鄂輝於五十五年曾經來藏自必深知其事鄂輝愿蒙

委任尤非俘習渾等可比若於此等外番交涉事件亦敢隱匿不奏尤出情理之外原擬至宗喀時詢明鄂輝卽行叅辦但現在質證無人恐鄂輝尙思推卸不肯據實供明卽日經過宗喀令鄂輝隨赴前藏計至藏時和琳應已將此項表貢查出再行提集俘習渾雅滿泰與鄂輝面加質證切實辦理嚴行

奏叅治罪

二十九日

福康安孫士毅惠齡和琳奏言官兵由濟隴聶拉木撤回
自應分定起數以便隨到隨行不致稽時糜餉東路至拉
里一帶臣和琳預爲辦理足敷支用拉里以東前經臣孫
士毅將旋兵馬匹口糧事宜逐加籌辦臣惠齡於接印後
復飭行各臺站官員認真妥辦毋許臨時貽誤臣福康安
復通飭各臺站妥爲料理並再三嚴飭帶兵各員約束各
兵安靜行走不許稍有擾累惟東路道里縣長山徑險窄
現當冬令冰雪載途嶺高路滑應令各兵分路行走以免

擁擠查自藏至打箭爐係屬正路而三雜谷綽思甲巴底
巴旺瓦寺沃什黨壩等土兵由草地回至本處程途較爲
捷近令接到藏前後酌定各兵起數除巴塘副土司成勒
春丕勒帶領土兵爲數無多前已遣令先回預備該處烏
拉外其由正路行走者將先到前藏之索倫達呼爾兵丁
分爲五起令領隊大臣烏什哈達統領帶頭起在前行走
乾清門侍衛阿尼雅布收後督查四川省標及建昌官兵分
爲五起令副將五十一參將扎爾杭阿管領又甘肅來藏
安臺告請隨征官兵及降番屯練並川北等鎮官兵回藏
在後接續起程分爲八起令總兵彭承堯統領帶頭起在

前行走總兵朱射斗收後督查其由草地行走者係三雜
谷孔薩綽斯甲巴底巴旺革布什咱瓦寺沃什黨壩等處
土兵分爲六起令總兵諸神保統領帶頭起在前行走總
兵袁國璜收後督查如此分路按程行走途中不虞擁擠
應付亦可從容且各有統領收後大員管束不致稍有滋
事所有巴圖魯侍衛章京海蘭察已帶領一起回京茲復
派副都統職銜翁果爾海

乾清門侍衛桑吉斯塔爾侍衛五紹等分帶兩起啟程現留
翼長德楞泰侍衛克興額等八員以備差遣又患病之參
領額爾錦保等六員暫留在藏調養一俟調理稍愈卽令

回京至臺藏防戍兵丁已屆年滿者前經臣孫士毅已將
更換之兵預行派出歸入征兵數內應急於征兵內挑選
壯健者按數更換以凱旋後到藏到臺之日起扣滿年限
再行更換

十一月初四日奉

旨補授鑲藍旗蒙古副都統

十二月二十七日

福康安孫士毅惠齡和琳奏言竊查乾隆五十五年廓爾
喀遞到謝

恩表貢交存巴勒布商人巴特巴第處收貯未經具

奏一案

臣

等到藏後即將鄂輝俘習渾雅滿泰嚴切詢問先

將大概情形恭摺奏

聞茲嚴廷良解到並傳齊案內人證隔別研究細加質對緣此項表貢實係嚴廷良自陽布帶來其時鄂輝尙在前藏因貢物只有四樣不堪呈進鄂輝先已發檄曉諭廓爾喀自必遵檄辦理又據嚴廷良面稟廓爾喀隨卽差頭人進京納貢是以鄂輝欲俟廓爾喀貢使到來再辦未便先行具奏與普福商定後復向雅滿泰告知雅滿泰普福二人遂祇將嚴廷良到藏日期具奏並未以帶到

表貢之事奏

聞嗣俘習渾於十月二十九日到藏雅滿泰復將前後緣由告知
俘習渾亦復因循未奏其收存

表貢之多喇拉木原係來藏講諭銀錢之人因藏內不能照依
行使先令阿幾堪噶回巢告知多喇拉木等候兩月仍未
講明卽將帶來銀錢易換金子欲回陽布於十二月初三
日赴駐藏大臣衙門稟辭並將貢物等件帶往嚴廷良亦
一同進見俘習渾因貢品較少又未專差貢使前來將多
喇拉木與嚴廷良一併面加諭飭多喇拉木隨將各物仍
舊帶回寓所其時多喇拉木因金子業已換妥卽欲回巢
此項

表貢本非伊經手帶來因卽令巴勒布商頭巴特巴第之夥計箕格哩從伊寓所取去送交巴特巴第家收存巴特巴第詢知廓爾喀進貢物件是以小心收存不敢拆動直至今年九月間將原封大小皮包共十五件按數呈出反復訊問並非嚴廷良交給亦非噶厦轉交衆供均屬確鑿又廓爾喀寄鄂輝各稟含混其詞俱稱有所許之語自係指許給銀兩而言臣等前向鄂輝研訊祇供上次曾經許將所鑄銀錢准其一箇當兩箇唐古忒若與不和准其稟訴稟內所指想係此語實無許給元寶之事茲臣等復將鄂輝嚴訊堅不承認查此項

表貢關係外番交涉之事豈容因循日久匿不上

聞卽因貢品較少並無專差頭人恭齎進京亦應一面駁斥一面具

奏乃鄂輝於嚴廷良到藏輒因廓爾喀貢使未來不合體制不卽具奏顛倒督亂莫此爲甚至普福因指望貢使卽到輒聽鄂輝所言與雅滿泰未經奏出普福旋即回京已屬不合而俘習渾亦卽扶同徇隱不奏不辦迨至上年廓爾喀滋事之時事隔半載有餘俘習渾雅滿泰俱在前藏鄂輝隨後又已到來均仍不據實奏

聞情罪俱屬重大今

臣

等業已詳悉詢明惟普福現在刑部監禁

其中供詞間有未符之處必須質訊明確方成信讞相應
將鄂輝鎖押解至刑部與普福質對確實從重治罪俘習
渾雅滿泰扶同不奏均有應得重罪查伊二人係奉
旨在藏永遠枷號示衆應否解到刑部從重治罪之處伏候

訓示

諭曰福康安等奏審訊壓擱廓爾喀表貢匿不具奏一摺鄂輝於
許給廓爾喀銀兩一事或尙可諉爲不知至五十五年廓爾喀
呈進表貢壓擱不奏現經福康安等面加詰訊鄂輝雖輾轉支
飾而此事係其主見已屬百喙難辭今福康安等並未按律定
擬請將鄂輝等解京治罪試思解到後卽交軍機大臣覆訊明

確亦不值卽將伊三人概行立寘重典若交到部監禁是伊等身獲重譴轉藉此回京安坐罔圖殊不足以示儆計此時鄂輝起解在途亦距藏不遠著傳諭惠齡英善接奉此旨飛飭沿途不拘鄂輝解到何處卽於該處截留仍解回前藏交與和琳將伊永遠枷號與俘習渾雅滿泰同爲在藏辦事大臣不肯用心妥辦致藏地不靖者戒

數月以來自擦木邦杏濟隴熱索橋協布魯東覺堆補木等處七戰皆捷殲戮賊衆不下五千人指顧卽抵陽布而賊首望風膽落再三遣大頭目至軍營乞降并一切恪遵檄諭無敢抗違將軍福康安察其籲於至誠然後許

爲奏請

皇上體念好生之德不爲過甚亦卽允之於是拉特納巴都特遣噶箕第烏拉特塔巴等奉表入

朝於本月抵都而廓爾喀平

五十八年癸丑

公四十九歲

四月廓爾喀所貢象馬由青海至京各軍凱旋自將軍及在事文武諸功臣三十人第其勲績

命圖形紫光閣

御製贊者十五爲前功臣圖

命儒臣製贊者十五爲後功臣圖公位列後十五功臣第四

恭錄

上命儒臣製贊

副都統西朗阿巴圖魯德楞泰

奪橋燬寨克卡破圍單騎百戰千人一揮仄徑螺旋大河鳧渡颯
爽英姿光留竹素

九月初三日奉

旨管理健銳營事務

是年公繼配鄒夫人來歸

五十九年甲寅

公五十歲

三月二十六日奉

旨補授正紅旗護軍統領

四月公繼配鄒夫人卒

七月二十二日奉

旨調補正白旗滿洲副都統

公繼配聶佳夫人來歸

